

02. maj 2017

**Inatsisartut aalajangiiffigisassaattut siunnersuut Naalakkersuisut peqqunneqassasut Island-imi kalaallit sinniisoqarfiannik pilersitsinissamut, pitsaasumik sanileriinnerup ineriartornera qulakkeerniarlugu Kalaallillu Nunaannut inuiaqatigiinnullu kalaallinut Island-imik suleqateqarnerup sapinngisamik annertunerpaamik pitsaanerpaamillu iluanaarutigisinnaaqullugu.**

(Namminiilivinnissamut Nunanullu allanullu Naalakkersuisoq)

Naalakkersuisut Islandimi nunatta aallartitaqarfeqarlernissaa pillugu inatsisartunut aalajangiiffigisassatut siunnersuutaanut Siumumiit imaattumik oqaaseqassuugut:

Siumup anguniarpaa nunatta naalagaaffinngornissaa, uagutsinnut tunngasutigut nammineerluta tamakkisumik akisussaaffigilernissarput - avataaniit naalakkatut isigisunit oqartussaaffigineqarata. Siumup kissaatigaa uagut, nunatta inui, nammineerluta killilersugaanatalu nunatta soqutigisai pillugit nunanik allanik isumaqatigiissuteqartalernissarput - pinngitsaaliissummik nakkutilliisoqarata.

Taamaattumik Siumumiit imaattumik siunnersuuteqarneq nuannaarutigigatsigu oqaatigissavarput. Tassami nuna namminiilivikkiartortoq ukiuni kingullerni nutaaliaasuni pilersikkiartuaagarput – pileriartortillugu nunanik niueqatigisinnaasatsinnik niueqatigileriikkatsinnilluunniit pitsaasumik siunerfeqarnermi suleqatigiinnissat siunertaralugit aallartitaqarfeqarfiit ammarneqartalerput. Tamanna pingaaruteqarluinnartoq Siumumiit isumaqarpugut!

Siumup ataatsimeersuarneranit anguniakkanit issuaalaarpunga:

*” Nunanik allanik niueqateqarnerup annertusarneqarnissaa Siumup pingaartippaa. Canadap, USA-p Islandillu suleqatiginerat annertunerusariaqarpoq, niuernermi aningaasartuutit appassinnerpaaffimmiitinnissaat aamma siunertaralugu.”*

Tassa Siumumiit ilisimaaraarput Nunat qaninnerpaasavut suleqatigisariaqarlugit. Tassunga ilanngullugu oqaatigissavarput nuannaarutigisatsinnik Royal Arctic Linep EIMSKIPimik suleqateqalerneratigut nunat qulaani taasavut sukkanerusumik suleqatigisinnaanngussagatsigit. Tamannalu aamma iluatsillugu oqaatigerusupparput piffissaq taamaattoq iluatsillugu Islandimi aallartitaqarfiliornissaq pissusissamisoortut isigigatsigu. Naatsersuutigaarpullu Naalackersuinikkut qulakkeerneqassasoq nunat allat ilaasa nioqqutissaatitsinnik ataasiakkaanik eqqusseqqusinninneri akitsuutitigulluunniit killilersimaarinninneri eqqarsaatigalugit nunat pineqartut Naalackersuinikkut aallartitaqarnikkullu oqaloqatigisarnissaat pisariaqartoq.

Taama oqaaseqarluta Siumumiit una siunnersuut ilassilluaratsigu oqaatigissavarput. Oqaaseqarnerpullu iluatsillugu aallartitaqarnermut tunngasunik imaattunik saniatigut oqaasissaqarlaarpugut.

Qulaani nunanik allanik suleqateqarnermik tunngasunik suleqateqarnerup pingaartinneranut nassuiaativut uteqqinngikkaluarlugit naalackersuisut kajumissaarpagut aappaagu EU-mik isumaqatiginninniarnissamat Kalaallit EU-mi aallartitaqarfiani inuttaliisariaqarnermik misissueqqullugit. Tassami siumumiit kissaatigaarput Nunatta EU-llu aalisarnikkut niuernikkullu isumaqatigiissuteqarnerata nutarterneqartuarnissaa ineriartortittuarneqarnissaalu, aammalu nunatta EU-mik suleqateqarnerata ineriartorteqqinnissaanut piffissatsialaanera siumumiit oqaatigissavarput.

Siunnersuut Nunanut allanut sillimaniarnermullu ataatsimiitsitaliami suliarnineqarnissaa innersuussutigaarput.

Ineqi Kielsen